

IMPALAER AR RUSSI

LAZET D'AN DRIZEC A VIZ MEURS 1881

TON : *Va c'halon a zo fraillet, pe eun all.*

Me o ped 'ta Bretonet, c'houi tud a Vreiz-Izel,
Da glevet eur verz neve, var eun torfet kruel,
'Zo gret, siouaz ! d'an drizek euz miz meurs er bloa-ma,
Gant Nihilistet difeiz, tud demeuz ar falla !

Hentchit d'in o va Doue, hentchit 'ta va fluen,
'Vit skriva e mil eiz kant un ha pevar ugent,
An torfet great er bloa-ma 'barz e bro ar Russi,
Er gear a Zant-Petersbourg gant bombou Orsini !

An dud fall o doa klasket, pemp guech araok hirio,
Da Impalaer ar vro-se, rei tol fall ar maro !
Ar c'henta hini ,siouaz ! 'barz e Sant-Petersbourg,
A glaskaz e laza, oa Karagozoff, traitour.

Pa edo an den fall-se o vonet da denna
Var ann Impalaer, siouaz ! 'vit gellout he laza,
Voe bet guelet eur paésant o pegi en he vreaç'h
Ha d'an torfetour bras-se hen en em gavaz treac'h !

Allas ! evit an eil guech 'oa tennet var-nezhan,
E voa ebarz e Paris, Napoleon tri ganthan !
Eur marc'h zoken oe tizet gant tenn Bérezowsky,
Pa edo o klask laza Impalaer ar Russi.

Solowieff zo bet an trede demeurez ar vuntrerien ;
Var an Impalaer karet en doa tennet pemp tenn :
Mes gant Doue diouallet euz a nerz an tennou,
Ar Czar n'oa met he vantel toullet gant bolojou !

Ar bedervet guech, siouaz ! a oa klasket an tu
Da rei dezhan ar maro a oa dre ar marc'h-du,
Evit an torfet Hartmann 'noa laket 'n he speret
'N eur vina an hent houarn an trein vije strinket.

Faiet oa var he dorfet kerkouls hag he dud fall,
Trein ar Czar a dremenaz, hen c'hortozaz eun all ;
Lammet a ra ann eil trein' kredi oa 'n Impalaer,
Ha padal ne oa eno nemet he zillad kaer !

Alexandr daou zo hirio saveteet he vuez,
Dre ma zint bet faziet en ho fallagriez,
Mes meur a hini, siouaz ! 'n euz kollet he groc'hen,
P'eo bet draillet didannho trein ha hent gant eun tenn !

Pedir guech 'n euz ho guelet 'klask an tu d'he laza,
Ha hirio 'vit ar bempet 'maint sonjal he flastra ;
Rak minet 'deuz he balez 'leac'h ma vez ho tibri,
Evit gellout he vouga pe gant tan he zevi.

N'oa ket c'hoaz ann Impalaer 'barz er zal erruet,
Pa oa gant an dud fall-se, siouaz ! en ear strinket ;
Rak ar re-man doa sonjet ober dezhan he dol,
'Pad ma vije ho tibri gant he dud euz an dol !

Ar Czar oa c'hoaz o prezeg gant tud er meas ar zal,
Pa oa gant Nihilistet, an ti oll o strakal ;
Dek soudard ha tri-ugent oa enterret eno :
Seiz ha daou-ugent blesset ha dek, siouaz ! maro !

'Vit hirio o deuz kollet dre eurvad ho amzer,
O klask he laza, siouaz ! 'n he di ann Impalaer !
Flastret zo bet kouskoude, gant ann Nihilistet,
Dre ho daouarn miliget, a leiz a zoudardet.

Ho guelet on deuz brema pemp gueich o klask diskar.
Dre ho zorfejou kruel ann Impalaer ar Czar ;
Ha hirio 'vit ar c'huec'hvet 'zeuint aben d'he laza
Gant bombou fall Orsini, traou euz ar c'hruella !

Setu 'ma brema, siouaz ! digouezet marteze
An devez trist 'vit ar Czar ma renk koll he vue ;
Goude kreizte, d'an drizek a viz meurs tremenet,
Hen a oa eet da velet revu he zoudardet !

Allas ! n'eur vont d'he balez euz a vanej Michel,
Eleac'h m'oa bet o velet he zoudardet fidel,
Hen a iez da velet he c'hoar gaer d'he falez,
Evit ar veich diveza, siouaz ! 'vit ar vuez.

P'en devoa great he visit oa o tistrei d'he di,
Ebarz n'he gariolen pa oar deut d'he brevi,
Rak eun den fallakr, siouaz ! e ru Milliona,
Stlapaz eur bomb didannhi 'vit gellout he drailla !

Gant ar bomb-se o krevi ar vouetur oe draillet,
Ha d'ann Impalaer, siouaz ! lazet kalz soudardet !
Heman 'n eur vel an torfet 'ziskennaz d'ho zicour,
« Pegit brema emezhan ; pegit barz en traitour ! »

Neuse ar bobl gant coler a begaz er muntrer
Dre m'en doa klasket siouaz ! laza an Impalaer ;
Bez e oa eun den iaouank, Roussakoff e hano,
Ha hirio 'vit he dorfet an dud her miligo !

Ann Impalaer a jomaz evit c'hoaz hep gouli
Epad m'oa en dro dezhan 'tud 'n ho goad o veusi,
Mes 'vit he voal-heur, siouaz ! hen vale var he droad
Pa oa draillet he voitur gant bomb eun den ingrad !

'Noa gret 'met nebeut pasiou oa guelet eun den fall,
'Stlapa tre he zivesker, siouaz ! eur goal vomb all ;
Ha trous houman o krevi 'reaz d'ar guer strinka,
Var an tiez oa eno ha d'ann oll dud keueza !

Pa oa eet kuit ar moget, neuse e oa guelet
E oa gant ar bomb, siouaz ! 'n Impalaer gouliet,
Draillet dezhan he ziou c'har, he gorf oll e gouli
Gant nerz an tammou, allas ! eus ar bomb o krevi !

Ann Impalaer oe douget 'n eur gador d'he balez
Gant an dud vad glac'haret hep e anaoudegez ;
E-lec'h da diveur anter e rentaz he ene,
Ebarz 'n eur boan ar vrassa, d'an Aotrou he Zoue !

An Impalaer oe ganet d'an dri a viz ebrel,
Ha d'an drizek a viz meurs, siouaz ! e renk mervel ;
Er bloaz mil eiz kant triouec'h e oe ganet ar Czar,
E un ha pevar-ugent lazet gant tud digar !

Bez en devoa evel-se tri bloaz ha tri-ugent,
Pa zeo bet, siouaz ! lazet gant an dorfetourien !
Evit he oll zujidi oa eun den ar guella, .
Ha mad he vro a glaske da genta e pep tra.

An Impalaer Alexandr daou a oe ganet d'an dri a viz ebrel
e miz eiz kant triouec'h ; demezet d'an eiz varnugent a viz
ebrel 1841. Bez en devoa c'huec'h kroadur, ha tad koz a voa
hirio da c'houezek. Pemp guech a voa bet klasket he laza ;
hag er c'huec'hvet, int deut a ben da laza anezhan, siouaz !
Lazet eo bet d'ar zul trizek a vis meurs 1881, gant tud fall a
rer anezho Nihilistet ; barz e Frans a rer anezho Franmasso-
net pe Radicalet.

GREAT GANT EUR GLAZIC.

(Tous droits réservés.)